

Nunatsinni saammaasseqatigiinneq anguniarlugu saammaasseqatigiinnermut aningaasateqarfimmik pilersitsinissaq siunertarlugu nalunaajaanissamik Naalakkersuisut suliaqartussatut peqquneqarnissaannik Inatsisartut aalajangiiffigisassaattut siunnersuut. Nalunaajaat aningaasateqarfiup qanoq aningaasalersorneqarsinnaaneranut periarfissanik aamma imaqassaaq. Nalunaajaat kingusinnerpaamik UPA2027-mi saqqummiunneqassaaq.

(Naalakkersuisut Siulittaasuut)

Akissuteqaat

(Naalakkersuisut Siulittaasuut)

Siullermeerneqarnera

Aallaqqaasiullugu Inatsisartunut ilaasortaq Nivi Rosing, Inuit Ataqatigiit, siunnersuuteqarneranut qutsavigissavara.

Inatsisartunut ilaasortap Nivi Rosing-ip Saammaateqatigiinnissamut Isumalioqatigiissitap saammaateqatigiinnissamik suliap ingerlaneranut ilapittuutaalluni ilisimatusarnermut suliniutinullu tapersersuutaasussamik saammaateqatigiinnissamut aningaasateqarfimmik pilersitsinissamut tunngasoq Inassut normu 3 erseqqissaatigaa.

Pilersitsinermi siunertaasoq tassaavoq isummat katsorsaariaatsillu ineriartornerat Kalaallit Nunaata inuisa ajorunaarsarnerannut ilaasinnaasut Kalaallit Nunaanni inuit nukittuffiinik ersarinnerulersitsiutigaluni tapersersussallugit, nalunaajaat aningaasateqarfiup qanoq aningaasalersorneqarsinnaaneranut periarfissanik aamma imaqassasoq siunnersuuteqartup siunnersuummi allappaa, tamatumani Naalakkersuisup Siulittaasuata nalunaarusiornissaq tunngavilersuutaalu ilalerpai.

Naalakkersuisut paasivaat isumaqatigalugulu siunnersuuteqartup ajorunnaarsarnissamut pisariaqartitsinermut tunngavilersuutaa, soorlu Inassut normu 3-mi aamma siunertaasoq. Nunatsinni naqisimaneqartutut misigineqarsinnaasut pissutsit suli atuuttut siunnersuuteqartup tunngavilersuummini ilanngullugu allappaa isorliunerusunilu innuttaasut ullumikkut aqqusaakkat suli imaannaanngeqisut malugisimagaat, taamaammallu suli saammaateqatigiinnissaq anguniarlugu annertuumik suliassaartoq.

Inassut normu 3-mi sulinermut atortussanik ineriartortitsinissaq siunertarineqarnera Naalakkersuisut erseqqissaatigissavaat, taamaaliornikkut Kalaallit Nunaanni suliffeqarfiit tamarnik ineriartuutaasumik ajorunnaarsaaqataallutik tapersiiniassammata.

Nunatsinni saammaateqatigiinneq anguniarlugu saammaateqatigiinnermut aningaasateqarfimmik pilersitsinissaq aningaasalersornissaanillu siunertaqarluni Naalakkersuisut nalunaajaammik suliaqartussatut UPA2027-milu saqqummiunneqartussanngorlugu peqquneqarnissaannik Inatsisartut aalajangiiffigisassaattut siunnersuut matumuuna innersuussutigaa.